

**Date – 22/04/2026**

**Time - 7:30 -7:40 Hrs**

**AKASHVANI AIZAWL**

**REGIONAL NEWS BULLETIN**

**HEADLINES (MORNING)**

1. Aizawl Municipal Corporation (AMC) inthlan chu boruak muanawm tak hnuaiah nimin khan neih a ni a, hriat theih chinah vote za zela 62.77% a tla a ni.
2. Larsap General (Retd) VK Singh a'n Department of Library and Information Science, Delhi University dinchamphaphak vawi 80-na lawmna hun a hmanpui.
3. West Bengal Assembly inthlan thawhkhatna leh Tamil Nadu Assembly inthlan campaign chu nimin tlai khan a tawp a. Naktuk ah vote thlak a ni ang
4. Sawrkar laipua Defence Ministry chuan cheng vaibelchhe 975 man T-72 leh T-90 tank tana TRAWL Assembly lei a remti.

<><><>

**AMC POLLS**

Aizawl Municipal Corporation (AMC) inthlan chu boruak muanawm tak hnuaiah nimin khan neih a ni a, hriat theih chinah vote za zela 62.77% a tla a ni.

Akashvani News Aizawl thudawn danin nimina AMC inthlanah hian vote za zela 62.77% a tla a, nimina polling station a vote thla zawng zawng hi za zela 61.14 % niin Home Voting leh PED vote thlak nen a vaiin za zela 62.77 % vote a tla a ni.

Aizawl Municipal Corporation inthlan hi AMC inthlan vawi 3 lo neih tawh te nena khaikhinin tun tuma inthlanah hian vote thlak an tlem ber a, kum 2010 khan vote 63.60% tla in kum 2015 khan 63.55% vote a tla thung a, kum 2021 ah vote 64.19% tla in tun tumah hian 62.77% a tla a, nimina polling station a vote thla zawng zawng hi za zela 61.14 a tla a ni.

AMC inthlanna ah hian ward 19 awmin, polling station 264 a awm a, vote thlak theih hun chhung hi zing dar 7 atanga tanin tlai dar 5 thleng hawn niin AMC inthlanna tura vote nei awm zat chu hmeichhia nuai 1, sing 2, sang 9 leh 656 leh mipa nuai 1, sing 1 leh 333 an ni a, an vaiin vote nei hi mi nuai 2, sing 3, sang 9 leh 989 an awm a, mipa ai hmeichhia an tamna chu 19,323 a ni. Vote awm tamna ber chu ward 18-na niin, vote 18,906 an awm a. A tlemna ber ward 8-na-ah vote nei mi 7,975 an awm thung. AMC huam chhungah hian hian a veng bil ang a vote tamna ber chu ward number 2-na huam chhunga Bawngkawn Veng a ni a, vote 6,442 an awm a ni.



## **DRUGS SEIZURE**

Nimin khan Champhai Police te'n ruihhlo an man cheng vaibelchhe 465 (₹465 crore) chuang hu an man chu DC Pu Mohammad Aaquib chuan District Hospital Complex-ah a halral.

Bawrhsap Pu Mohammad Aaquib chuan thu sawiin, nikumah cheng vaibelchhe 117 (₹117 cr.) chuang hu ruihhlo halral a nih tawh thu leh kuminah hmasawna ropui tak Champhai Police te'n neia cheng vaibelchhe 465 chuang lai man halral a ni leh tur chu lawmawm a tih thu a sawi a, hun lo kal zelah ruihhlo titem zel tura chawl lova thawh zel a tul thu leh thalaite'n ruihhlo an khawih lohna tura nasa zawka zirtirna pek zel a tul thu a sawi a. Champhai thalaiten infiamna kawngah theihna sang tak an neih thu sawiin thalai ruihhlo khawihte chuan anmahni nun an tihchhiat bakah an chhungte thlengin an tihbuai avangin do kawngah theihtawpa hmalak a tul thu a sawi a ni.

Ruihhlo halral takte hi Champhai Police te'n hmun hrang hranga an man, District Court-in halral tura phalna a pek tawh te an ni.



## **GOVERNOR**

Larsap General (Retd) Vijay Kumar Singh chuan nimin khan Department of Library and Information Science, Delhi University dinchamphaphak vawi 80-na, Convention Hall, Vice Regal Lodge, Delhi University campus-a neih chu Khuallian niin a hmanpui.

Hemi puala thu a sawiah Larsap General (Retd) Vijay Kumar Singh chuan Public Library leh Lehkhabute ngaihhlutawm leh tlo zia tarlangin, tunhma anga ngaihhlut an hlawh tawk ta lo chu veiam a tih thu a sawi a. Europe ram te'n public library an dah pawimawh dan sawiin, entawntlak a tih thu a sawi a, kalkhawmte chu tun hma anga library ngaihhlut nachang hre thar leh tura chahinLibrary hlutna thar thawh leh a tul thu a sawi.

Larsap chuan zirna ina library pawimawhna a inher danglam ve tih sawiin, library chu ram hmasawn nana inghahna pawimawh tak anih thu a sawi a. Zirna kawnga India sulhnu ropui takte chhuanawm a tih thu sawiin, Nalanda University chu zirna lama sulsutu pawimawh tak anih thu a tarlang a. Department of Library and Information Science, Delhi University te'n kum 80-na hmel an hmu chu a lawmpui thu sawiin, an kalzelna turah duhsakna a hlan a ni.



## **NIGER**

Nimin khan Bilkhawthlir Block Agriculture Dept leh Farmer Producer Organisation (FPO), Bilkhawthlir tangkawp chuan Chemphai, Bilkhawthlir a loneitute mi 26 te hnen atangin Niger (Hawite) an thar chhuah Kg 2154 an lei sak.

Niger (hawite) hi Kg ah Rs. 80/- in an lei sak a, Hawite hriak hi chawhmeh kanna atana hman, hriak hrisel tak a ni a. Hawite chi hi FPO, Bilkhawthlir te chuan khawl ah herin litre ah Rs.350/- in an hralh thin a ni.

Kumin February atanga FPO in Hawite hriak an hralh tawh zat chu litre 325 a ni a, Hriak ei chi a intodelh hi sorkar laipui hmalakna anih avangin sorkar pawhin a ngai pawimawh hle a ni.

><><>

## **LMC SANITATION**

Lunglei Municipal Council Vice Chairman Pu K. Lalrinawma kaihhruaia LMC huamchhunga Municipal Sanitation Committee thukhawm chuan LMC huamchhunga faina kawnga intihsiak kalpui dan tur an sawi ho.

Thutkhawmah hian LMC hnuaia local council 24 chu category hnihah thenin, fai inelna hi kum tluana kalpui ni se, an ti a , Fai intihsiakna pual hian LMC BoC chuan cheng nuai 5 ruahman a ni. Tun dinhmunah Lunglei khawpui chungah veng 18-in anmahnia bawlhhlawh khawn leh paih an buaipui mek a, LMC-in lirthei tira bawlhhlawh a khawna veng paruk an awm thung a ni.

Bawlhhlawh sawngbawl na tur, Lunglei Solid Waste Management Centre (SWMC)-I sak mek chu hman theiha peih fel thuai beisei a ni a, khawl pawimawh hrang hrangte chah mek niin bawlhhlawh chhek khawm sate pawh sawngbawl mek a ni a. SWMC-I-ah chuan bawlhhlawh tawih thei leh tawih thei lo thliar hran a, a hranga sawngbawl a ni tawh dawn a ni.

LMC Municipal Sanitation Committee chuan faina leh thianghlimna kawnga Lungleiin hma a sawn zel theih nan Lunglei mipuite chu mahni in leh a vel leh khawpui vawn fai kawngah te, bawlhhlawh thliar hran kawngah leh bawlhhlawh thehthang kawngah te tan la zel turin an ngen a ni.

<><><>

## **KHAWZAWL KVK**

Nimin khan KVK Khawzawl Training hall-ah Tomato chi semchhuah a ni.

He hun hi KVK Khawzawla Senior Scientist Dr. Malsawmkimi chuan kaihruai a. Khawzawl leh Champhai District chungah khaw hrang hrang – Tuipui, Neihdawn, Rabung, Khawhai, Chawngtlai, Kawlculh leh Chawngtlai phaiveng atanga Tomato Growers Association hruaitute an kalkhawma, an hnen atang hian kum 2025-26 chungah an Tomato chin dan leh an thar chhuah zat report ngaihthlak niin, report atanga a lan danin kum 2025-26 chung hian Tomato Quintal 20085 (singnih sawmriat panga) an thar chhuak a, an pekchhuahna rate hniam ber - Kg khat ah Rs. 45/- atanga chawhrualin Rs. 90,382,500/- (Nuai Zakua Pathum Singriat

Sanghnih Zanga) vel an la lut tawh a, chhungkaw tam takin eizawn nan an hmang mek a ni.

Khawzawl leh Champhai District huam chhungah hian KVK Khawzawl hian kum 2021 atangin Indian Institute of Horticultural Research (IIHR –NEH) Scheme, Bengaluru hnuai atangin Tomato chinga hma la te hnenah Tomato chi hi an pe chhuak thin a, vawiin ah pawh hian heng Khaw 7 (Pasarih) atanga lo kalkhawmte hnenah hian Tomato chi kg 7, Association member 697 te daih tur semchhuah a ni.

<><><>

#### AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

#### LDCC

Lai District Congress Committee, Media and Communication Department chuan nimin khan PWD enkawlna hnuai Thingkah a 3rd IR Battalion hmunpui panna kawng siam mek chu an Chairman Pu Lalawmlova Chinzah hovin an enfiah.

Lai DCC Media thuchhuaha tarlan a nih danin kawng siamna tura lung an lakkhawm chu lung chhia, keh awlsam tak hlir a ni tiin kawng tlawhtute chuan an sawi a, 3rd IR Battalion hotuten lung chhia leh tha lo Contractor in hman a tum chu an hriatthiam loh thu leh, Sipai awmna kawng engtik lai pawha Security thila che chhuak thut thei an nih avangin a tha thei ang bera siam sak an duh thu an lo sawi a ni.

Lai District Congress Committee kawng siam nan hmanraw tha ngei hmang turin Sorkarin hma la se an duh thu an sawi a, Congress party chuan enzui reng an tum thu an sawi bawk.

<><><>

#### CAMPAIGN

West Bengal Assembly inthlan thawhkhatna leh Tamil Nadu Assembly inthlan campaign chu nimin tlai khan a tawp a. Naktuk ah vote thlak a ni ang.

West Bengal ah chuan inthlan thawhkhatnaah Assembly bial 152 ah vote thlak a ni dawn a. Tamil Nadu-ah chaun assembly bial 234 ah vote thlak a ni ang. Nimin campaign tawp ni ah Political Party hrang hrang ten voter te rilru hneh tumin theihtawp an chhuah a. Union minister leh Senior BJP leader Amit Shah chuan West Bardhaman leh Silliguri ah vantlang inkhawm a huaihawt a. Asansol ah BJP hruaitu Rekha Gupta-in vantlang inkhawmah thu a sawi bawk. Trinamool Congress President leh West Bengal Chief Minister Mamata Banerjee chuan Haldia ah thu a sawi a. Congress, Left leh party dagnte pawhin an candidate te puin an campaign

bawk. West Bengal Assembly inthlan thawhnhina hi April ni 29 ah neih leh a ni ang.

Tamil Naduah chuan nimin Senior BJP leader leh Union Minister Piyush Goyal a campaign a. AIADMK hruaitu Edappadi Palanisamy pawhin Salem ah thu a sawi a ni.

Tamil Nadu ah hian voter vaibelchhe 5 nuai 73 sing li sang 3 leh 291 an awm a. Inthlan thawhkhata neih turah an aiawh roreltu an thlang ang.

<><><>

## **DEFENCE**

Sawrkar laipuia Defence Ministry chuan cheng vaibelchhe 975 man T-72 leh T-90 tank tana TRAWL Assembly lei a remti. Heng ralthuam tihchangtlunna tur inremnaah hian Bharat Earth Movers Limited leh Electro Pneumatics and Hydraulics (India) Pvt Limited ten Defence Secretary Rajesh Kumar Singh-a hriatpuin an hming an ziaak a. TRAWL Asembly hian rahpuah bomb kam paltlang na kawngah tank te tan venhimna tha zawk a siam dawn niin Indian Army hotute chuan an sawi a ni.

<><><>